

MARY MAGDALENE LEH ATHOKIK TOPA!

Mary Magdalene in hanah hongpai in;

a) Asi Jesu luanghawm a en dingin hongpai hi,

Ahi zongin, anungta Jesu Topa hongmu hi.

b) Asi Jesu luanghawm avildingin hongpai ahihi,

Ahi zongin, Upna thuthuk ahi thawhkikna thu avilmasa nu hongsuak hi.

c) Asi Jesu luang mite suksiatding alauna tawh zingtuung in, mite thawhma in hongpai hi,

Ahi zongin, vangliatna tawh kidimin, asiatheilo athokik Topa' pumpi hong angpom hi.

d) Asi Jesu luanghawm mangkhinhi ci-in, lau in dahin kapin, khitui tawh hongzong hi,

Ahi zongin, a thokik Topa in "Mary aw" ci-in, sapna aw tawh dawntuahna nangah hi.

e) Asi Jesu hangin, dahin kapin, thuuma, leitungah lamet bei in Mary hongom hi,

Ahi zongin, athokik Topa hangin, nuamna khitui hongnul in, lungdamna tawh hongpau khia a, lametna adim nuntakna tawh, "Ka Topa aw!" ci-in, hong samkik ta hi.

Athokik Topa vangliatna hangin;

a) Mite paampaih, mite in thupi a angaihsut ngeiloh ahi, Mary Magdalene in,

Tu in, athupi pen, aki mangngilhthei ngeilo ding mi manpha penpen khat hongsuak hi.

b) Athugen te thutung ngeilo in, kua mah in a up ngeiloh Mary Magdalene in,

Tu in, leitungmi khempeuh gupkhiatna apia lungdamna thu ahi, "Topa thokik hi" cih thu hong tangko masa MI hong suak hi.

c) Theihna neilo, telna neilo ci-in, leitung pilna nei te leh, leitung milian te in angaihsut uh ahi Mary Magdalene in,

Tu in, leitung mipilte telzawhloh, theihzawhloh leh leitung milian ulian tuamtuum te bat zawh loh "Thawhkikna thuthuk" hong mukhia masa leh, atel masa, athei masa, aciam masa leh anuntakpih masa nu hong suak hi.

d) Minam ulian te, Pharisee te, Laisiangtho siamte, leh amau le amau ahoih a akingaihsun mite adingin, minam vai leh Pasian thuvai ah thuneihna leh kilawmna khat zong anei lo Mary Magdalene in,

Tu in, tuamite adingin, man aneih hetloh hangin, Pasian leh athokik Topa a um takpi, abia takpi, thawhkik pawu amuak leh adawn takpi te adingin, athupi penpen MI hongsuak hi.

Tua hi leh,

i) A thokik Jesu Topa sungah, akipaampaih mi kiliansak in, aki nengniam mi ki lamsang hi.

ii) A thokik Jesu Topa hangin, leitungvai ah thutheilo te mipil suakin, leitungvai ah ulian ahilo te mithu pipen te hongsuak ta uhhi.

iii) A thokik Jesu Topa hangin, leitungvai a buaina te, leitung vai a lungkhamna te, Topa sungah, Topa tawh, Topa adingin apthei takpi leng, Mary Magdalene mah bangin, Leitung lung khamna pan, Pasian sungah lung muanna, dahna pan lungdam na khitui anul dinge ihihi. Alleluia!